

von Rotenburg biz her geclaget hete oder furbaz clāgeten, uf keynem andern werltlichen gerihte, dann vor irm rihtter in der stat zu Rotenburg, daz daz keyn krafft noch maht haben sol und in daz furbaz an ir liben noch an ir gūten keyn schade sin sol, und daz die vorgevant pene da von billich vervallen sie, als da vorgeschriben stet. Und des zu urkunde geben wir in mit urteil disen brif versigelt mit unsers vorgevantten herren des Romischen cheisers hovegerihts insigele.

Der brif wart geben zu Mergentheim, an dinstage vor allerheiligen tage, von Cristes gebürt drützehenhundert jar und in dem nūnden und drizigstem jare.

Wohlerhaltenes Siegel an rothgelben Seidenfäden; Umschrift: S. iudicis curie Lvdowici Romanorum imperatoris. Kleines Rücksiegel mit derselben Umschrift.

XV. Kaiser Ludwig an Hagenau über die bevorstehenden Verhandlungen über die Pfahlbürger. 1341 Sept. 2.

Or. Reichsarchiv, Habelsches Archiv Fasc. 12.

Wir Ludowig von Gots genaden Romischer keiser ze allen ziten merer des riches enb(ite)n den wisen luten, . . | dem schulth(eize)n, . . dem burgermeister, . . dem rat und . . den burgern gemeinlichen ze Hagenow, unsern lieben getriwen, unser huld und alles gūt.

Als iwr burger von iuern wegen an uns geworben habent umb die pfalburger, sult ir wizzen, daz wir . . den herren dar umb unser ernstlich brief gesant haben, daz si ez umb die pfalburger stan sullen lazzen, als ez bis her gestanden ist und dar zū nichtz tūn, bis daz wir selb hinab an den Rin oder gen Elsazzen komen. So wellen wir zwischen herren und den steten dann bestellen und reden, als ez besten sol und daz den herren und . . den steten recht geschicht, wan die sache ander stet dann iuch ōch an gat. Wolten iuch . . die herren dar uber angriffen, so ist unser gūt wille, daz ir iuch ir werend und ez understandent, so ir best mūgent. Und heizzen ōch unsern lantvogt, daz er iu von unsern wegen dar zū beholfen sin sol.

Geben ze Burkhusen, an dem sunntag nach Egidii, in dem XXVII^{em} jar unsers richs und in dem vierzehenden des keisertums.

Mit I M am Schlusse. Reste des kleinen rothen rückwärts aufgedruckten Siegels.